



Els èn da nov veterans d'onur ed han chantà cuminaivel 600 onns en in chor.

«Sajas in exempel per noss giuvenils»

Uniun chantunala da veterans da chant

DA GION NUTEGN STGIER / ANR

■ **En il center da la dieta a Laax èn ina giada dapli stads la cumpagnia ed il barat da contacts tranter ils veterans e las veteranas da chant da noss chantun. Gist 14 chantadurs ed ina chantatura èn vegnids undrads sco veterans d'onur.** Cun bler cor e cun in plaschair singular, dentant er enromà da chant da vaglia, ha il Chor viril Laax organisà la 32avla dieta da l'Uniun chantunala da veterans da chant. Da tedlar ils 35 umens a chantar è stà in delectg ed ina gia dapli ha il chor, sut la direenziun d' *Umberto Camathias*, confermà ch'el tutga en il Grischun tar l'elita dals chors da vischnanca. Ils 210 veterans e veteranas èn vegnids retschets cordialmain e quella cordialità è lura stada preschenta en fin a la fin da la dieta. Beneventada è la societad er vegnida da *Simon Caviezel*, il president dal Chor viril Laax e lura er da *Franz Gschwend*, il president communal.

Pleds da curaschi en direenziun Bondo

En ses pled da bainvegni ha *Gion Darms*, il president da l'uniun che reunescha ils veterans e las veteranas da chant da noss chantun, sa mussà solidaric cun la vischnanca da Bondo. Avant che salvar la dieta saja inditgà e pli che be ina obligaziun da far intgins patrats a tut quai che saja succedi ils davos dis a Bondo, ha ditg

Darms. El speria che quels da Bondo han bainspert puspè fidanza en la natira ed en lur vita quotidiana.

Esser veteran è in'onur

Da preschent haja l'uniun 994 commembers e quai saja bain in bel dumber, ha ditg Darms. Tuttina spera el che dals 32 chors che sajan betg commembers da l'uniun fetschian intgins anc quel zap. En il decurs dals davos onn èn dus chors sortids da l'uniun, il Corale di Mesocco ed il «Männerchor Davos». Entrads èn lura er dus chors, il Chor mischedau Laax ed il Männerchor Maienfeld. Er sch'in chor exista betg pli e sch'in chor saja pli pauc activ, esser veteran saja tuttina in'onur e quella onur saja da manteganir, ha menziunà Darms. Las aczias da l'Uniun chantunala da veterans da chant sajan creschidas, ha ditg il cassier *Guido Ratti*, cun scriver ella suentar intgins onns puspè in gudogn da 500 francs.

En in chor vala mintga vusch

Sa drizzada a la societad è lura er *Lucretia Bärtsch*, la presidenta da l'Uniun chantunala da chant dal Grischun. Per daventar veteran haja mintgin d'esser in lung temp commember activ d'in chor. Ina da las raschuns da far uschè ditg part dad in chor saja bain il plaschair da chantar, dentant er l'amur tar il chant da chor. Singular saja segir er da contribuir cun l'atgna vusch

ad ina reussida d'armonia da bleras vuschs. En in chor vala mintga vusch, ha ditg Bärtsch. Chantar en in chor saja er esser avert per nova litteratura, tgirar il chant tradiziunal, avair ina finamira ed en cuminanza cuntanscher quella. Mintga veteran haja dà bler a ses chor, però er retschet bler, ha punctuà Bärtsch. Las bleras ed empernaivlas uras cuminaivlas durant e suentar las provas, las excursiuns cun ils chors e lura er l'aspect social, quai sajan be intgins exempels persuentar, ha ditg Bärtsch. Chantar saja er per ils giuvenils puspè «cool», quai conferman er las bunas prestaziuns dals dus chors Incantanti e Chor da giuvenils Grischun tar occurrenzas da chant internaziunalas. «Sajas in exempel per noss giuvenils», ha ditg Bärtsch a la fin da ses pled.

En in onn a Salouf

La commembranza d'onur da l'Uniun chantunala da veterans da chant per lur activitad da 50 onns e dapli en in chor han retschet 14 umens ed ina dunna. Tranter ils undrads è er in bel dumber veterans da chors rumantschs. Sa regurdads èn ils preschents lura er dals 24 veterans e da las otg veteranas che han gi da bandunar l'onn passà quest mund. A fin è il di en cumpagnia i cun il chant da cuminanza sut la direenziun da *Roland Capeder*. En in onn ha la dieta lieu a Salouf e per l'organisaziun segna il Chor masdo Stier-va Mon Salouf.



Il Chor viril Laax ha dà a la dieta il bul da chant.



Chant regional, chantunale e da veterans uni: Simon Caviezel, Lucretia Bärtsch, Michela Duschletta Forer e Gion Darms (da san.).



Surmir e la Surselva a la dieta: Niclo Simeon, Otmar Netzer, Marcus Casutt e Gion Casutt (da san.).



Rinaldo Camathias, chantadur cun corp ed olma.



Vin alv per ils novs veterans d'onur.

FOTOS G. N. STGIER



Ignaz Cathomen (a san.) en discussiun cun Gion Balzer Casanova.



Da buna luna: Ursulina Cavegn, Rita Bass, Norbert Bass ed Alfonsina Arpagaus (da san.).